

## Inatsisissatut siunnersuummut nassuiaatit

### **Nalinginnaasumik nassuiaatit**

Aningaasanut inatsisissap isumaqatigiinniutigineqarneranut atatillugu aalisarnermi akitsuutit allanngortinneqarnissaat kissaatigineqarpoq. Ingammik sinerissap qanittuani qaleralinniarnermi akitsuutip appartinneqarnissaa kissaatigineqarpoq.

Sinerissap qanittuani qaleralinniarnermi akitsuutip appartinneqarnissaa aningaasalersorsinnaajumalugu, siunnersuutigineqarpoq aalisakkat avammut nioqqutigineqartut akitsuuserneqartartut tamarnik akitsuutaat allanngortinneqassasut, kiisalu akitsuutit qummut killissaa 17,9 procentimiit 18,4 procentimut qaffanneqassasooq. Kisiannili ilutigalugu siunnersuutigineqarpoq 2022-mi avataasiorluni saarullinnik kullerinek, saarulliusanik, suluppaakkanik aalisarneq sinerissallu qanittuani raajarniarneq akitsuusiinermi ilaatinneqassanngitsut.

Naatsorsuutigineqarpoq 2022-p ingerlanerani inatsisissatut siunnersuummik saqqummiussaartoqassasooq, avataasiorluni saarullinnik kullerinek, saarulliusanik, suluppaakkanik aalisarneq sinerissallu qanittuani raajarniarneq akitsuutaasa oqilisaaffigineqarneri ataavartunngortinneqarlutik.

### **2. Siunnersuutip pingaarnertut immikkoortui**

Akileraarutit akitsuutillu aningaasanut inatsimmi oqaasertaliussaqaqarnerinnakkut pisinnaagaluartoq nalilerneqarpoq, akitsuutit pisariaqartitsinermi inatsisinek toqqammaveqarluni piginnaatitsineq inatsimmik allannguinermi qulakkeerneqartariaqartut.

Inatsisissatut siunnersuummi tamanna qulakkeerniarneqarpoq.

### **3. Siunnersuutip aningaasatigut allaffissornikkullu pisortanut sunniutigisassai**

Siunnersuut allaffissornikkut sunniuteqassangatinneqanngilaq. Sinerissap qanittuani qaleralinnik aalisarnermi akitsuutip peerneqarnera Nunatta Karsianut 2022-mi 16 mio. kr.-nik isertitakinnerulerneranik sunniuteqassaaq. Avataasiorluni qaleralinniarnermi raajarniarnermilu akitsuutip qaffanneqarneratigut Nunatta Karsiata isertitai ukiumut 8,5 mio. kr.-t missaannik annertuseriassapput.

Taakku isertitanut sunniutigisassai 2022-mut aningaasanut inatsimmut siunnersuutip pingajussaanerlugu suliarineqarnerani allannguutissatut siunnersuutit suliarisassanngorlugit ilanngunneqassapput.

Avataasiorluni raajarniarnermi qaleralinniarnermilu akitsuutit qummut killissarisaasa qaffanneqarneranni kilisaatini inuttanut akiliutit annikinnerusumik ikileriaassapput, kiisalu tamatuma malitsigisaanik akileraarutitut A-nut aammalu ingerlatseqatigiiffinnut akileraarutitigut isertitat ikilerialaarsinnaallutik. Akitsuutit qaffariarnerat ima killeqartigisutut isigineqarpoq, avataasiorluni raajanik qaleralinnillu aalisarneq sulii iluanaaruteqarfiulluni ingerlasinnaasooq naatsorsuutigineqarluni.

**4. Siunnersuutip aningaasatigut allaffissornikkullu namminersorluni inuussutissarsiortunut sunniutissai**

Akitsuutit qaffanneqarnerat pillugu namminersorluni inuussutissarsiuteqartunut siunnersuutip aningaasatigut sunniutai immikkoortoq 3-mi allaaserineqarput. Sinerissap qanittuani qaleralinniarneq annertoqataanik akitsuutitigut oqilisaaffigineqarpoq.

**5. Pinngortitamut, avatangiisinut inuillu peqqissusaannut sunniutaasussat**

Siunnersuut pinngortitamut, avatangiisinut inuillu peqqissusaannut sunniuteqartussaangilaq.

**6. Innuttaasunut sunniutaasussat**

Siunnersuutip innuttaasunut, aalisarnerup iluani suliaqartunut, sunniutissai pillugit allaaserisat immikkoortoq 3-mi allaaserineqartut innersuussutigineqarput. Sinerissap qanittuani qaleralinnik aalisarnermi assinganik akitsuutit oqilisaaffigineqarput.

**7. Sunniutaasussat allat pingaaruteqarnerusut**

Inatsisissatut siunnersuut naalagaaffeqatigiinnermut sunniuteqarsinnaasunik malitseqanngilaq.

**8. Oqartussat kattuffiillu tusarniaaffigineqarnerat**

Aningaasanut inatsisissamut isumaqatigiinniarnernut atatillugu inatsisissatut siunnersuut ilusilersorneqarmat tamanut tusarniaassutigissallugu periarfissaqarsimangilaq.

**Inatsisissatut siunnersuummi aalajangersakkanut ataasiakkaanut oqaaseqaatit***§ 1-imut*

## Nr. 1-imut

Siunnersuutigineqarpoq tunisinermi akiusup 5 procentimit 5,5 procentimut qaffanneqassasoq inummumut allamut tunniussinermi imaluunniit Kalaallit Nunaanni annissinermi.

## Nr. 2-mut

Inassutigineqarpoq § 6, imm. 3-mi akitsuutip qummut killissaa 18,4 procentimut aalajangiunneqassasoq.

*§ 2-mut*

## Imm. 1-imut

Siunnersuutigineqarpoq inatsit ulloq 1. januar 2022-mi atuutsinneqalissasoq.

Imm. 2-mut

2022-mi ikaarsaariarnermi aaqqiissutissatut siunnersuutigineqarpoq inatsimmi § 6, imm. 1-imi akitsuutit saarullinnik kulleridik, saarulliusanik, suluppaakkanik aalisarnermi sinerissallu qanittuani raajarniarnermi 5 procentimik akitsuuteqartitsineq aalajangiusimaneqassasoq.

Imm. 3-mut

Ilannullugu siunnersuutigineqarpoq 2022-mut ikaarsaariarnermi aaqqiissuteqartoqassasoq, inatsimmi § 6, imm. 3-mi akitsuutip qummut killissaa saarullinnik kulleridik, saarulliusanik, suluppaakkanik aalisarneq sinerissallu qanittuani raajarniarneq allannguuteqarnani 17,9 procentiussasoq.